



## **Newyddion News release**

**Dydd Gwener 9 Gorffennaf 2010**

# **Blaenau Gwent yn ysbrydoli beirdd ifainc**

**Yr wythnos yma, daeth disgyblion Ysgol Gyfun Brynmawr, Blaenau Gwent, wyneb yn wyneb â'r bywyd gwyllt sy'n byw ar garreg eu drws.**

Ymunodd y disgyblion â swyddogion cefn gwlad o Gyngor Bwrdeistref Sirol Blaenau Gwent i archwilio'r rhyfeddodau naturiol o'u hamgylch yng Ngwarchodfa Natur Leol Pwll a Choetir Beaufort Hills.

Lleolir y warchodfa natur ar gyrion Cwm Clydach, gyda Pharc Cenedlaethol Bannau Brycheiniog i'r gogledd a threfi Brynmawr a Beaufort i'r de. Mae hi'n ferw o fywyd gwyllt, ac yn hafan i ambell rywogaeth brin.

Yn ystod yr wythnosau nesaf, ar ôl dychwelyd i'r ystafell ddosbarth, mi fydd y disgyblion yn ail-fyw eu profiadau trwy gyfansoddi cerddi yng nghwmni Caryl Parry Jones, y darlledydd a'r bardd. A phan fydd yr Eisteddfod Genedlaethol ymweld â Glynebwy, mi fyddan nhw ymhlith y perfformwyr cyntaf, gan gael cyfle i ddarllen eu cerddi yn y Babell Lên.

Yn ôl Chris Engels, Swyddog Cefn Gwlad Cyngor Bwrdeistref Sirol Blaenau Gwent: "Yng Ngwarchodfeydd Natur Lleol yr ardal yma, rydych chi'n cael ymdeimlad gwirioneddol o heddwch, gyda dim byd ond natur yn eich amgylchynu – rhywbeth sy'n bwysig dros ben i'n hiechyd a'n lles yn y byd prysur sydd ohoni.

"Mi welodd y plant ryfeddodau o bob math – gwesynnod a glöynnod yn hedfan, yn ogystal â brogaod a madfallod, gyda chân yr adar yn gyfeiliant i bopeth. Cafodd pawb amser gwerth chweil wrth faeddu'u dwylo yn y pyllau dŵr, ac mi ddaethon ni o hyd i greaduriaid cudd o bob math.

"Gobeithio bod y trip wedi ysbrydoli'r plant ac wedi rhoi profiad ymarferol iddyn nhw o'r lle bendigedig sydd ar garreg eu drws."

Yn ôl Caryl Parry Jones: “Rydw i wedi bod yn ymweld ag ysgolion ers blynyddoedd i siarad am farddoniaeth ac i ysgrifennu cerddi gyda’r plant. Rydw i’n edrych ymlaen yn fawr at yr wythnosau sydd i ddod, pan gaf gyfle i helpu’r plant gyfansoddi cerddi’n sôn am y syniadau a’r teimladau sydd ganddyn nhw tuag at eu hamgylchedd lleol. Dyma ffordd wych o feithrin hyder y plant.”

Pan fydd y plant yn darllen eu cerddi ar goedd yn yr Eisteddfod ddechrau mis Awst, gobraith y Cyngor Cefn Gwlad yw y bydd Pwll a Choetir Beaufort Hills – yn ogystal â safleoedd natur gwych eraill sydd daflad carreg yn unig o’r maes – yn ysbrydoli gweddill yr Eisteddfodwyr yn yr un modd.

Mae disgyblion Ysgol Gymraeg Brynmawr (ysgol gynradd) wedi cymryd rhan yn y fenter yn ogystal, ac mi fyddan nhwythau hefyd yn cael cyfle i adrodd eu gwaith yn yr Eisteddfod.

I gael mwy o wybodaeth am y prosiectau sydd gan Flaenau Gwent ar y gweill i gyfoethogi bioamrywiaeth, ewch i:

[www.blaenau-gwent.gov.uk/leisure/7679.asp](http://www.blaenau-gwent.gov.uk/leisure/7679.asp) <<http://www.blaenau-gwent.gov.uk/leisure/7679.asp>>

Mewn partneriaeth â’r Eisteddfod Genedlaethol, a chyda chefnogaeth gan yr Academi (sef y gymdeithas sy’n hybu ysgrifenyddwyr a llenyddiaethau Cymru), mae’r Cyngor Cefn Gwlad yn noddî’r prosiect barddoniaeth ‘natur ein cymuned’.

Caiff Gwarchodfa Natur Leol Pwll a Choetir Beaufort Hills ei rheoli gan Gyngor Bwrdeistref Sirol Blaenau Gwent, gan weithio’n agos â’r *Beaufort Hill Ponds and Woodland Preservation Society* ac ar y cyd â chymdeithas y cominwyr.

## DIWEDD

**I gael mwy o wybodaeth am y datganiad hwn, ffoniwch Helen Evans ar 07717225589 neu Brân Devey ar 02920 772 403/ 07747767443 (Swyddogion y Wasg, Cyngor Cefn Gwlad Cymru), neu anfonwch e-bost at [Sioned@eisteddfod.org](mailto:Sioned@eisteddfod.org).**

### ***Mwy o wybodaeth am Warchodfa Natur Leol Pwll a Choetir Beaufort Hills.***

Yn y gorffennol, bu llawer o gloddio am haearn ar y safle. Cafodd cronfeydd dŵr mawr eu hadeiladu er mwyn cael digon o ddŵr ar gyfer y gweithgareddau yma. Ar ôl i’r gwaith diwydiannol ddod i ben, cafodd natur gyfle i ailfeddiannu’r safle.

Heddiw, mae’r safle’n hafan i fywyd gwyllt, gan gynnwys ambell rywogaeth brin. Ymhlith y cynefinoedd ceir coetir, rhostir, dyfroedd codi, merddyfroedd agored, gwrychoedd, creigiau agored a gwahanol fathau o weiriau. Yn ôl

arolygon, mae'n debyg bod y cynefinoedd yma'n cynnal nifer o famaliaid, gan gynnwys ystlumod a dyfrgwn.

Mae pedwar deg pump o wahanol fathau o adar wedi'u cofnodi yma, gan gynnwys yr ehedydd a'r gornchwiglen. Hefyd, ceir cynefinoedd addas ar gyfer ymlusgiaid ac amffibiaid. Ymhellach, mae deuddeg o wahanol fathau o löynnod ar y safle, a naw o wahanol fathau o wesynnod.

Roedd y gwaith rheoli'n cynnwys plannu coed; cadw'r llwybrau'n glir; a gosod a chynnal llwybrau, pontydd, giatiau ac arwyddion. Ceir cefnogaeth amhrisiadwy gan y *Beaufort Hill Ponds and Woodland Preservation Society*, gan gynnwys wardeiniaid gwirfoddol ar y safle.

Cafodd y safle'i ddynodi'n Warchodfa Natur Leol fis Ebrill 2009. Mae'n adnodd pwysig i'r gymuned leol, a chaiff ei ddefnyddio'n bennaf ar gyfer cerdded, gwylio adar a physgota, yn ogystal â marchogaeth o dro i dro.

- **Corff a Noddir gan Lywodraeth y Cynulliad yw'r Cyngor Cefn Gwlad, ac mae'n gweithio i gael Cymru well lle mae pawb yn trysori ein hamgylchedd naturiol ac yn ei warchod. Gellir cael mwy o wybodaeth am ein gwaith ar [www.ccg.gov.uk](http://www.ccg.gov.uk).**